

لقطة من الدنيا

د.هايدى شرف

مؤسسة يسطرون للطباعة والنشر والتوزيع



رئيس مجلس الإدارة

عماد سالم

المدير العام

أحمد فؤاد الهادي

مدير الإنتاج

أحمد عبد الحلیم

الطبعة الاولى

الكتاب : لقطه من الدنيا

المؤلف : د.هايدى شرف

تصنيف الكتاب : تنمية بشرية

تصميم وإخراج : أحمد عبد الحلیم

المقاس ١٤ × ٢٠

رقم الإيداع : ٢٠١٦ / ٢١٩٩٠

الترقيم الدولي : 0 - 296 - 776 - 977 - 978

العنوان : المكتبة والمطبعة : ٣ ش صفوت - محطة المطبعة شارع الملك فيصل - الجيزة

التليفون : ٠١٢٢٩٣٠٠٠٢٩ - ٠١١٥٧٧٦٠٠٥٢

Email : yastoron@gmail.com

موقعنا على الفيس بوك : مؤسسة يسطرون لطباعة وتوزيع الكتب

جميع الحقوق محفوظة للمؤلف

الإهداء

إهداء خاص إلى والدتي ووالدي وأخي وأئلي، من
علموني كل شيء.

إلى أساتذتي وأصدقائي الذين استفدت من تجاربهم
وساهموا في وضع لقطات هذا الكتاب.

د.هايدي شرف

مقدمة

لقطة من الدنيا بيعرض لقطات كثير من حياتنا وبنقف عندها و
بتؤثر فينا و في مشاعرنا و بنعيشها كل يوم بتفاصيل مختلفة،
و الهدف من الكتاب ده مش بس اننا نعرض جزء منها...الهدف
اننا نعرف ازاي نتعامل معاها و نستفيد منها لأقصى درجة عشان
يساعدنا نحقق اللي احنا عايزينه و اتخلقنا عشانه

د.هايدي شرف

وجع

بنبذل مجهود، فى كل حاجة بنبذل مجهود، عشان تنجح، عشان تجيب فلوس، حتى عشان تتفسح، لازم حتبذل مجهود، ده حتى الفشل فيه مجهود يا مؤمن، مجهود بدنى و معنوى و عقلى، كل الناس بتتعب، ده واقع كلنا عايشينه، المشكلة إن حتى المجهود ده محتاج يتنظم، كل دقيقة بتتصرف من عمرك، كل نفس بتتنفسه، كل حرقه دم و غضب، حتى كل لحظة فرح، كل ده لازم يبقى محسوب، لأننا بنعيش وقت طويل تحت الضغوط و الالتزامات و فرحنا لو جه بيجى متغلف بالهموم و لو زعلنا بنتخيل إن الحزن حيفضل طول عمرنا فمابنبقاش حتى مستعدين نستقبل اى فرحة، الحزن و الضغط و الزعل و عدم التوفيق كلها أوقات من عمرنا و محسوبة علينا، عمرها ما تخلص بصفة نهائية و فيه فترات بتمر على الواحد كتيرة بيبقى مقفول على نفسه و مش عايز يكلم حد و لا يشرح لحد حاجة، عادى ده بقى الطبيعى، لكن اللى مش طبيعى إننا نحبس نفسنا جوة الحزن و الوجع و مانحاولش نخرج منه،

كأنه سجان، لازم نكمل طريقنا و نخرج برة وجعنا و ضعف نفوسنا قدام الحياة و زى ما بنعمل لحزننا اعتبار جامد كدة و بنخليه يتحكم فى ردود أفعالنا و ترتيب حياتنا، لازم كمان نعمل حساب لفرحنا و سعادتنا و أحلامنا حتى لو السعادة قليلة و أحلامنا بعيدة، مع كل يوم الشمس بتطلع فيه بتقولنا لسة فيه امل نقاوم الظروف و ننجح و نفرح، و كل ما تقع قوم واقف تانى ماتتهزمش قدام ظروفك و يأسك، المشوار طويل و الحياة مش سهلة و اللى حتأخذه حتدفع تمنه مافيش حاجة ببلاش و اللى حتأخذه بالرخيص عمرك ماحتافظ عليه لأنه جالك سهل، عشان كدة ماتستهونش بوجع النهاردة عشان هو ده اللى حتعرف قيمته بعدين.

حبّ آه، حبّ لأ

أحبك آه، لكن الحب يعمينى لأ

أثق فيك آه، لكن الغى عقلى لأ

أضحى عشانك آه، لكن أن تضحيتى تبقى أمر مسلّم بيه لأ

أقدّر تعبك و تضحيتك عشانى آه، لكن تذلى بدّه لأ

تغير علىّ آه، لكن تشك فى حبى لأ

أسيبك براحتك آه، لكن تستهون بوجودى و ماتحترمنيش لأ

العلاقة بين الراجل و الست لازم تبقى قائمة على الثقة

بس بعقل

بحب و معاه احترام و تفاهم

العاطفة لازم تكون موجودة و بقوة لكن العقل هو اللى

يديرها

الاتنين يكملوا بعض يحتووا بعض، يعرفوا يحلوا
مشاكلهم، لا الست تحسس الراجل إنها الحكومة و لا
الراجل يبقى السجان اللي بيسجن الست جوة أفكاره و
آراءه اللي بي فرضها عليها

الست سكن و الراجل أمان

الراجل حماية و الست حنان

علاقة الراجل و الست فيها تكامل

أساسها الرحمة و عمادها الإيمان.

خليك قد حلمك

ساعات كل حاجة تمشى عكس ما أنت عايز بشكل أنت نفسك تبقى مستغرب منه ، و مش فاهم ليه بيحصل معاك كدة ، و تبقى مش عارف حتكمل إزاي ، ساعتها لازم تقف وتراجع اللي انت عايزه ، إذا كنت فعلا عايزه ولا لأ ، عشان مافيش حاجة حتعملها أو طريق حتمشيه مش حتدفع ثمنه ، لازم تكون قد الحاجة اللي انت اختارتها

ولما تختار لازم تبقى متأكد إن اختيارك بيعبر عنك و بيمثلك عشان تبقى راضى عن كل حاجة حتدفعها ، لازم تراجع كل حاجة و نقيم أداءنا و نصحح أخطاءنا ، و الضربة اللي مش بتموت بتقوى ، و كلنا عشنا خيبات كتير و لسة حنشوف ، مافيش حاجة بتدوم إلا وجه الله ، عشان كدة ماتبكوش على حاجة ولا توقفوا حياتكم على حاجة ، حتى مش مهم حتكملوا إزاي ، المهم انكوا تبقوا عايزين تكملوا ، مش مهم كام مرة مش حتظبط معاك ، المهم إنك تقوم تقف على حيلك ، مهما الدنيا غلست عليك ، خليك قد حلمك .

مش مهم

مش مهم تكون غنى، المهم انك تعرف تبقى مبسوط و
راضي

و الفلوس اللي معاك تعرف ازاى تستثمرها صح سواء فى
شغل أو عشان تنبسط بيها

مش مهم يبقى عندك أعلى أدوات و إمكانيات، المهم،
إن اللي فى إيدك بتعرف تستخدمه لأقصى درجة

المفارقة الغريبة إننا بنتعب فى الشغل عشان نعيش
حياة مريحة، يعنى حتى الراحة بندفع تمنها تعب

ساعات الدنيا مرة واحدة تتعرض عليك، زى البضاعة
اللى فى الفتارين و انت اللي ترفضها بمزاجك و تزهّد
فيها، عشان هى أصلاً ماتسواش فى نظرك جنينه

فى كل الأحوال حنتعب، بس قبل ما نتعب، اتأكد
انك عايز الحاجة اللي بتتعب عشانها، عشان ماتخسرش
عمرك و أعصابك فى حاجة أنت مش مؤمن بيها

و لو مشيت فى طريق مش مقتنع بيه و مش قادر
تغيره، خلى تعبك فيه بفايدة و استفيد منه على قد ما
تقدر، لحد ما يجى الوقت اللى تقدر تغير للى انت عايزه
و لما حاجة بتحبتها تروح منك أو دورها يخلص فى
حياتك، ماتزعلش، هى راحت عشان حيلى اللى أحسن
منها، فاصبر

و خلى أمل يتولد مع كل يوم جديد بيحلى عليك
فبغير الأمل و الحلم، لا معنى للحياة

طريق الحياة

ساعات كثير محن تعدى، الواحد مش بياخد باله منها، و ساعات تانية محنة واحدة تتعرض لها بس تخلى أغلى حلم عندك مايسواش جنيه و لو جالك فرصة تحققه، انت اللي حترفضه، عشان المحنة بتضيع أى بريق وهمى و بتظهر كل شئ على حقيقته، فبتتأكد إن الدنيا ماتسواش و لا تستاهل يتزعل عليها، صحيح سمعنا الكلام ده كثير، بس لما تجرب حتعرف إنه مش كلام، احلم و اسعى لتحقيق حلمك بس لو ماجاش فى النهاية، راجع نفسك كويس و أكيد الخبرة اللي اكتسبتها حتتعلم منها و حتفيدك قدام، لا تزعل على فرصة راحت و لا تتغر بنجاح أحرزته، و اتعلم إن النجاح و الفشل، الاثنين، خطوات فى طريق الحياة اللي حيوصلك- لو انت عايز -لبر الأمان.

لحظات فارقة

حتمشى فى سكة و تسعى ليها بكل الطرق، و فى آخر لحظة كل حاجة حتتلقى عشان سبب خارج عن إرادتك، يمكن يكون أهم من كل اللى انت كنت بتسعى ليه، ساعتها ماتزعلش، كفاية إن ربنا شهد على اجتهادك، حيكافئك ازاي، مش شغلك، وخليك متأكد إن ربنا حييبتلك حاجات أحسن من اللى انت كنت عايزها و ماحصلتش، معدنك الحقيقى بيبان فى اللحظات الفارقة والقرارات المصيرية اللى بتأخذها ساعة الأزمة، ساعتها بس حتعرف انت مؤمن فعلا بكل اللى ربنا بيكتبه عليك برضا ولا كلام بتصبر بيه نفسك وانت مش عارف معناه، فيه لحظات مهمة فى عمر البنى آدم بتبقى بعمره كله، حاول تثبت فيها قدام نفسك إن معدنك أصيل عشان تستاهل تنول رحمة ربنا وتدخل جنته.

البركة عنوان الخير

ممکن ربنا یرزقک باللی انت عایزه، بس ما یبارکک
فیه، و ممکن تاخذ حاجة ما کانتش تخطر علی بالک و ربک
یبارک فیه و تاخذ خیرها لحد آخره، دوروا علی الحاجة
اللی ربنا مبارک لکم فیه و ماتفرطوش فیه؛ لأن البركة
عنوان الخیر.

صندوق الدنيا

ساعات بتبقى عايز تخرج برة الأفكار، برة الناس، برة كل حاجة، حتى برة نفسك، بتفقد اللذة فى كل حاجة كانت بتسعدك وبتحبها حتى اللى كنت بتهرب له عشان تخفف عن نفسك هو فى لحظة ممكن يبقى حمل عليك و مش طايقه، لما تجى لك الحالة دى، لازم تبعد، تبعد عن كل حاجة و عن أى حد حتى حبايبك، لأنك مش حتعرف تبقى كويس معاهم، ابعده لحد ما تهدا و ترجع لك نفسك تانى و يبقى عندك الطاقة و القدرة انك تكمل مشوارك من جديد، لحد ما تستعيد نفسك، اخرج برة الصندوق، صندوق الدنيا.

المعركة الأخيرة

أنت تقدر تهزم أى حد مهما كان قوى لو عندك إرادة و إيمان لكن أصعب أنواع الحروب اللى ممكن تخوضها فى حياتك، هى حربك ضد ذاتك، لما تكون بتشدك لتحت و أنت عايز ترفعها لفوق، هى عايزة توقعك و أنت بتقاوم، أكثر حاجات بتهد الإنسان الألم و المرض و الإحساس بالعجز، و لما تتعرض لحاجة منهمم أو للتلاتة مع بعض، فى لحظة حتحس بالضعف و إنك مش قادر تكمل، و بعدين تقول لنفسك كدة كدة أنا تعبان، يبقى مافيش فايدة من القاعدة خلىنى أحارب لحد آخر نفس و آخر دقة قلب و آخر نظرة عين و لو كانت معركتى الأخيرة و حتى لو ماوصلتش لآخر الطريق، كفاية إنى حسيب الدنيا و أنا راضى و إنى مت على طريقى اللى اخترته و روحت فداه، فدا حلمى الكبير، الطريق طويل مش سهل، و العمر مايبستناش حد و ماחדش حينفعك لو مانفعتش نفسك، ولاحد حيشيل ذنبك و حتتحاسب لوحدك، «وكلهم آتية

يوم القيامة فردا»، عيش الحلم وصدقته و آمن بيه لحد آخر
لحظة فى عمرك وجاهد نفسك لأنها فى لحظة واحدة
ممکن تبقى ألد أعدائك.

قرارك

المرض أبسط رسالة تقول للإنسان ما أضعفك، مهما كبرت وعليت ممكن شوية تعب يرقدوك فى السرير أسبوع، الواحد فى لحظة الضعف بيحس إن عمره ما كان قوى ولاحقق حاجة فى حياته، وإنه ماسبش أثر و لو مات انهاردة حيبقى وجوده زى عدمه، شوية دموع و حيتنسى بعد كدة، إذا حد عيط عليه أصلا، فى زحمة الدنيا والأيام والجرى بننسى حاجات كتير، بننسى الحقيقة، بننسى إن الدنيا كلها على بعضها شوية أيام و حتعدى بمزاجك أو غصب عنك، فعشها مبسوط، ماتعلقش سعادتك بحد و لاتربط مصيرك بحد، و لا تضيع عمرك حزن على حد ولا حاجة، و إذا كان الواحد بيمر بتحديات فاكبر تحدى هو تحدى العجز، إنك تقاوم عجزك ووجعك و تكمل مشوارك لآخر نفس فى صدرك، حربك مع نفسك هى المعركة الحقيقية اللى مافيش أى انتصار حيبقى له قيمة لو ما انتصرتش فيها، سعادتك من جواك و طريقك مفاتيحه فى إيدك ياتستسلم للعجز، يا تسيبه يقتلك، ده قرارك.

مقاومة

دايما تبقى عايز تشد روحك لفوق، و نفسك تشدك
لتحت، تبقى عايز تعمل الحاجة، و العجز و الخوف
يمنعوك

لو عايز تتأكد انك فعلا عايز حاجة و بتسعى لها،
شوف مدى قدرتك على مقاومة نفسك و انت تعرف حتوصل
لحد فين فى حلمك، على قد مقاومتك، حتكون النتيجة
زى ما انت عايزها.

من نفسك

نتيجة ظروف الحياة و الجرى ورا الدنيا و المشاكل،
فقدنا إحساسنا بالتعاطف مع غيرنا، ماحدث بقى فاضى
لحد ولا حد فاضى يبطبب على حد، و لو فيه شوية طاقة
عند الواحد فاضلين، يدوب بيطبب بيهم على روحه أو
على الناس اللي فى دايرة حياته الصغيرة، معظم العلاقات
بقت بتحكمها المصالح و المنافع و لو حتسأل على حد
بتكتشف فى آخر المكاملة أو المقابلة إن فيه طلب أو خدمة،
و نادرا لما تلاقى الاتصال خلص و محتوى المكاملة مجرد
سؤال عن الصحة و الحال، ده حتى أقرب الناس ليك
ممكن مايقوش متعاطفين معاك و مش حاسين بيك و لو
جيت تلومهم حيقولوا كل واحد ملهى فى حاله أو حيرد
يقول لك أنا باعمل كذا عشان عايز مصلحتك، لازم نرجع
الرحمة لحياتنا، ده الابتسامة فى وجه أخيك صدقة، إذا
كان على التعب كلنا تعبانين وقرفانين، فبلاش تزودوها
علينا و على نفسكم، يعنى لما تبقى تعبان، تبقى عايز

الناس تسأل عليك، و لما يبقي حد عنده مشكله يتصل بيك يحكى لك، طب انت كدة امتى من نفسك تحس إن صاحبك مش مضبوط و تكلف خاطر ك تتصل بيه تسأل عليه من نفسك، كل واحد فاكر إنه هو الوحيد اللي تعبنا و ماحدث معبره، رغم إنه هو نفسه مايبسألش فى حد و قافل دايرته عليه و بيقول ماحدث يستاهل، الدنيا هات و خد مش هات بس، واللى مش بيقدر يدى للناس تقدير و تعاطف ماينتظرش من حد عطف، لازم تتعلم تدى عشان تقدر تاخذ، تتعلم تعمل الحاجة من نفسك.

مقارنة

فيه ناس عندها مشكلة خصوصا اللي اتأذوا كتير فى حياتهم، إنهم مش بياخدوا القرارات بسهولة، حتى أبسط القرارات بيبقى عندهم تردد كبير قوى ياخدوها و ده بيسبب لهم إزعاج و ممكن يسبب لهم ندم كمان نتيجة انه بيضيع عليهم فرص كتير كويسة، سواء على مستوى العلاقات الشخصية أو على مستوى الشغل، و نتيجة التردد ده إن عقله بقى متبرمج على فكرة المقارنات و المزايدة، و دائما حاطط اللي حواليه فى اختبارات و بيقيس ردود الأفعال عشان يدى لنفسه حجة و مبرر إنه يأجل قراره ومايخدوش و يقول لأ أصل لسة الوقت مش مناسب، لما أخذ رد الفعل اللي أنا مستنيه أبقى أتحرك و آخذ القرار الفلانى، و ممكن جدا عقبال ما يظهر رد الفعل المنتظر، تبقى الفرصة خلاص راحت، عشان كدة ماتضيعوش حياتكم و فرص كويسة بسبب المقارنة أو المزايدة اللي هى فى الحقيقة هروب من اتخاذ القرار، لو عايز الحاجة بجد، اتشجع و خذ قرار

من جواك انك تاخذها، و تحمل النتائج مهما كانت، و
سيب المقارنات على جنب، عشان ماتفوقش متأخر بعد ما
يكون العمر راح و الفرصة ضاعت.

قدام الشاشات

لما بتدخل الفيس بوك يببقى كأنك واقف فى الشارع، أى حاجة بتعملها أو تقولها، أمة لا إله إلا الله بتتفرج عليها، و بتعلق و بتشارك، و أى حاجة تحصلنا، نجرى على الفيس نقول، عشان الناس تشارك، و نحس بالتعاطف و نعرف أخبار بعض، بقينا بنستنى نطمئن على بعض من الفيس، لما نيجى نقارن الأحداث اللي بتحصل فى الواقع بأحداث العالم الافتراضى حنلاقى إن الواقع على الأرض فى حياتنا قليل قوى و حتى لما بنحاول نرجع للواقع بنعانى و بنلاقى نفسنا مش متأقلمين معاه، لازم نرد و نجامل، مابقناش مستحلمين تعاملات الواقع و كتير فى العالم الافتراضى كنا مرتبطين بيهم جدا لما بنشوفهم فى الحقيقة بنلاقى إن الترابط مش بنفس القوة، ناس تظهر و ناس تختفى فجأة، عالم من الوهم احنا اللي اخترنا إننا نتسجن فيه، و اللي المفروض نعمله مش إننا نبعد عن الفيس لكن نعرف ازاى نستخدمه صح، من غير مايؤثر

على الواقع، و ده مش حيحصل مرة واحدة، ده عامل زى الإدمان، الانسحاب لازم يكون تدريجى، و بعد كدة نحط كل حاجة فى مكانها، العودة للواقع مهمة عشان حيفرق معانا كتير فرق الساعات اللى بنقضيه قدام الشاشات.

فین البديل؟

فى اى اجتماع عائلى الأيام دى ، تبص تلاقى كل واحد من القاعدين دافس دماغه فى الموبايل بتاعه ، مابقناش بنتكلم مع بعض وممكن نبعت لبعض كلام على الشات واحنا وشنا فى وش بعض ، طب ما نكلم بعض أسهل ، بلاش ... ممكن واحد يفضل قاعد فى أوضته ٢٤ ساعة مش بيقعد من أهله خالص و يزعلوا منه إنه مش بيقعد معاهم ، وانه دايمًا لوحده حتى لو حد جه زارهم ، مابيهتمش يقعد معاهم و حتى لو خرج يفضل دافس دماغه فى التليفون ، وأنا لا أستثنى احد ، حتى أنا بعمل كدة ، طب ما حدش سأل نفسه مين اللى وصلنا للواقع المؤسف ده ، أنا اقول لكم ، ببساطة جدا ، مافيش بديل حقيقى واقعى على الأرض نقدر نرجع له ، و يعبر عننا ، حتى لما بتيجى تكتب جملة فى الفيس يقول لك : فى ماذا تفكر الآن؟ يعنى الشاشة الصماء دى بتحس بينا أكثر من الناس اللى حوالينا ، بتكتب اللى انت عايزه ، و بتقول اللى انت عايزه من غير رقيب ولا حد يقعد يقول لك بتعمل دى ليه

ولا بتقول دى ليه، و اللى مش عايزه ببساطة حتحذفه أو
حتعمل له بلوك، حتعمل إيه بقعدتك مع أهلك و هما كل
ما تقعد معاهم ، حتبقى فى دايرة اتهام، و دايمًا مُدان و
مقصر و طريقة لبسك و كلامك و حياتك مش عاجباهم، ولا
حتقعد فى خروجة مع أصحابك تسبب التليفون عشان
تقضوها قاعدة نميمة و كلام على خلق الله، لأ اتصور معاهم
سيلفى و نزل صورتك و شوفها جابت كام تعليق وإعجاب
أفيد لك، باختصار كل واحد بيتسجن مع تليفونه و عالمه
الافتراضى لأنه الحاجة الوحيدة اللى بتعبر عنه من غير
تزييف، بيحسسك إنه شايفك و حاسس بيك، بتحس
انك متشاف و فى بؤرة الضوء، و فى نفس الوقت خلق
حالة كسل غير عادية، على قد ما العلم بقى متاح فى
مصادر كتير، و ممكن تحصل عليها بسهولة، على قد ما
بقى فى حالة كسل انك حتى تعمل داونلود لكتاب و لو
نزلته مش حتقراه، حتتباهى إن عندك على تليفونك ١٠٠
كتاب و ماقرتش منهم حاجة، زمان كان الواحد بيتعب
عشان يتعلم، عشان يحصل على معلومة صحيحة، كنت
بتتعب قوى عشان تبقى كاتب مشهور و لا ممثل معروف
لأن كانت السكك محدودة و بالعافية اللى كان يقدر يوصل،
دى الوقت من كتر الطرق ما بقت كتيرة و سهلة، برضه
بقى صعب انك تكون مميز على الساحة، حتبقى ضمن
مجموعة و ده مش غلط بس مش حتستمر إلا إذا كان عندك

صبر و لازم ببقى ليك تواجد على الأرض، أنا مابانكرش
إن التكنولوجيا سهلت حاجات كتير جدا بس فى نفس
الوقت، خليتها من غير روح، أكيد فيه فرق بين انك
تكلم والدك على الشات و بين إنك تكلمه وش لوش، فيه
فرق بين إنك تكتب قصيدة على الفيس و بييجى لك عليها
مئة تعليق و إعجاب و بين إن الوحي ينزل عليك و انت
قاعد وسط شعراء و عايش الحالة و بتبدع من وحي الجو
المحيط بيك، و المشكلة إننا بقينا خايفين نسيب العالم
الافتراضى عشان عارفين إن مافيش واقع حيرضينا، لا فيه
قدوة ولا حلم و لا تعاطف و لا سكة عارفين نمشى فيها،
احنا بنهرب لعالم اخترعناه و مش حنقدر نرجع للواقع إلا
إذا كان فيه بدايل حقيقية بتعبر عننا، وعلاقات حقيقية
غير مشروطة، مافيهاش مصالح و حتى لو فيها مصالح،
بس تكون واضحة و معلومة لكل الأطراف و تكون بعيدة
عن العواطف، مافيهاش لف و دوران، علم حقيقى حننزل
من بيوتنا عشان نتعلمه و نعرف إزاي نطبقه، مش مجرد
كلام نظرى، و كل واحد لازم يبدأ بروحه، بنفسه، طبعا
فى الأول حيواجه صعوبات كثيرة لأن العودة للواقع مكلفة
جدا، حتكلف مجهود و أعصاب و صدمات و ناس تفهمك
غلط و ناس تعرفها على الفيس لما تقابلها فى الحقيقة،
يطلعوا مقلب، حتلاقى الشغل مش بالساهل و التعامل مع
الناس عايز مجاملة و صد و رد و تناحة، و حتبقى انت

اللى وسط الناس عجبة، كله ماسك تليفوناته و انت الوحيد
اللى باصص لهم و مش لاقى حد تكلمه، ماحدش شايفك
أساسا، لما حتقعد مع أهلك، حيشتغل شريط البستفة أو
حوارات مالکش فيها، حتبقى مش مستحمل و عايز تقوم،
كل ده عارفة انه حيحصل، و أسهل حاجة تعملها، تقول
وانا علىّ من ده بإيه، ارجع زى ما كنت أحسن لى،
اشترى دماغى و اعمل زى ما الكل بيعمل، انت فعلا ممكن
تعمل كدة، بس للأسف ساعتها السكينة حتسرق عمرك،
حتلاقى شهر و يمكن سنين عدت من عمرك، مافيش
جديد فى حياتك، و بعدت عن أهلك، و كل الإنجازات
اللى عملتها فى حياتك افتراضية، مش حقيقية، صحيح
ممكن تكون فى وقت حافز لىك و تلاقى ناس مؤمنة بيك
مايكونوش موجودين فى الواقع بس هى فى الآخر مرحلة
ماينفعش تفضل واقف عندها، النت والتليفونات و الفيس
المفروض انهم يكونوا وسائل و ليس غايات، لو أدركنا
الحقيقة دى، حيكون عندنا وعى كويس جدا نقدر نتعامل
ببيه مع وسائل التواصل و النت عموما، و أهم حاجة تخلق
البديل المناسب اللى يحقق لك واقع ترضى عنه و تبقى
مواقع التواصل أداة تخدم واقعك مش العكس.

حد محتاج لك

فيه ناس دايمًا بتشتكى إن ماحدث مهتم بيها أو تلاقى عندهم احتياج عاطفى، مع إنهم مش بيهتموا بحد أو ما عندهم ش طاقة عطاء يدوّها لحد يإما لأنهم مروا بتجارب سيئة كتير خلت مشاعرهم باردة و إدّوا كتير و مالمقوش اللى يقدرهم، فقالوا ماحدث يستاهل، يإما هما من البداية ماكانوش بيدّوا حد حاجة و مش حاسين إنهم بخلا فى مشاعرهم و عطاءهم، فبتكون النتيجة إنهم بيتسابوا و هما مش عارفين اتسابوا ليه، فيه ناس كتير بتقع فى اللبس ده، و فى الغالب الناس دى بيكون عندها أنانية نوعا ما، النوع اللى مش شايف غير نفسه و بس، و بيبقى هدفه إرضاء ذاته و إشباع احتياجاته و مش بياخذ باله إن ممكن حد حواليه بيبقى محتاج نفس الشئ منه، العطف و الاحتواء و الاهتمام، فقبل ما تسأل نفسك انا ماحدث بيهتم بى ليه أو بيسأل علىّ راجع نفسك انت كمان، يمكن يكون حبك لنفسك خلاك ماتقدّرش إن فيه حد محتاج لك.

الوقت

بعد ما كتر فى الفترة الأخيرة موت الفجأة و الحوادث اللى بتحصل، أدركت مع كل الحاجات دى أهمية حاجة واحدة، الوقت، أهمية الوقت، احنا قرينا كتير عن تنظيم الوقت، و حاولنا نطبق فعلا، بس لما بتبقى حاسس إن مش فاضل لك كتير بتحاول تلاحق و مابتضيعش ثانية و تبقى خايف ماتلحقش تخلص اللى انت عايزه، طبعاً ما حدش بياخذ غير نصيبه فى الآخر، بس احنا بنضيع وقت كتير قوى، و كل ما العمر بيعدى بنحس قد إيه إحنا خسرنا كتير، عشان كدة لو فى ايديكوا نعمة استفيدوا منها لآخر وقت، لو والدك ووالدتك عايشين خليك تحت رجليهم مهما تعبت و اشبع منهم، مش حتعوضهم و بكرة يوحشك تعبك عشانهم اللى كنت مش مستحمله، ماتأجلش حاجة عايزها و تقول حاعملها بكرة لو تقدر تعملها النهارده عشان ممكن مايبقاش فيه بكرة، ماتأجلوش أحلامكم و لاسعادتكم، عشان ما حدش ضامن حاجة.

رهان

سيدنا موسى عليه السلام، لما سقى للبننتين، تولى إلى الظل و قال: «إني لما أنزلت إلى من خير فقير»، رغم إن ربنا إدى له قوة إلا إنه شايف نفسه صغير قدام ربنا، ماقعدش يقول انا عملت خير اهه فين التمن بقى، أو فين المقابل، كتير مننا لما ببيجى يتعامل مع ربنا بيتعامل بمبدأ انا حاعمل خير و استنى المقابل يبقى كذا، أو أنا حانذر لو ربنا حقق لى أمنيتى حاطلع صدقة و أنا هنا مش باتكلم على الحكم الشرعى إذا كان ده حلال أو حرام لأن أنا مش فقيهة فى الدين، بس لما تبقى ناوى تعمل خير اعمله من غير ما تشرط على ربنا انه يحقق لك حاجة معينة و لو ماعملهاش أو أخذ نعمة منك تبطل الخير اللى كنت بتعمله، انت عليك السعى و العطاء طالما تقدر تدى، ربنا حيكافئك إزاي مش شغلك، بس انت انوى انك تخلص النية لله و لازم تبقى متأكد إن ربنا ما بيضيعش تعب حد وإنه بيستجيب للدعوة و إلا ماكانش قال «ادعونى استجب لكم»،

كل الحكاية انه ممكن مايستجيبش فى ساعتها لحكمة هو يعرفها، حسابات ربنا غير حساباتنا، و يمكن اللى فاكرينه خير و زعلنا انه ماجاش نحمد ربنا مليون مرة بعد كدة إنه ماحصلش، ربك قادر يبعث لك احسن من اللى بتتمناه بس انت خلّى عندك يقين، و ماترهنش عبادتك و يقينك بعبء ربنا ليك، لأنك مهما عبدته مش حتديله حقه، و مع ذلك هو كرمه كبير و عظيم، هو الغنى عنا و يغفر مهما أخطأنا، اللهم ارزقنا فيك اليقين و الرضا و أغننا بفضلك عن من سواك.

على سنجة عشرة

احنا مشكلتنا إن الأجيال اللي قبلنا و اللي بعدنا، اتربت على إننا لازم نخلى الشكل حلو، لو المفتش و لا الوزير و لا المسئول جاي، لازم يبقى المنظر على سنجة عشرة و طظ فى التفاصيل اللي جوة، و نقول المهم الزيارة تعدى على خير و مانتفقسش، وبعدين نصلح البايظ و لا حتى مايتصلحش، المهم تعدى الزيارة من غير مشاكل و لما المسئول بيعدى حتى مش بيهتم بتفاصيل لأنه شايف الشكل من برة حلو، لكن لو بيهتم بالتفاصيل، كان شاف بلاوى، هو يهمله إن كل حاجة تبقى على سنجة عشرة بس من برة.

اختر طريقك

اوعى حد يقبل على نفسه حياة تطفى روحه و تقتلها وهو عايش مهما قال الناس عليها حلوة، ماחדش حيثئذى غيرك و ماחדش حيثعذب غيرك و ماחדش من الناس حيشيل عنك، اختار اللي انت عايزه و اتحدى كل الظروف و العرف و القيم المتخلفة اللي ياما دمرت حياة ناس عشان خافوا يخرجوا عن القطيع، ماחדش زى الثانى و ماחדش ببشيل و زر حد و لو تعبت و اتمرطت حتبقى راضى طالما بتعمل حاجة انت بتحبها أو اخترت تعيش مع حد بتحبه و قابله بكل عيوبه و قادر تعالجها، البنى آدم ممكن يموت لو فقد إرادته حتى لو عاش فى قصر، و ممكن يعمل معجزات لو ملك إرادته و اختياره حتى لو عاش فى كوخ، هى حياة واحدة حنعيشها، و ربنا بيحاسب كل واحد بطوله، فعيشوا و انبسطوا و ماتزعلوش على حاجة و لا تسمحوا إن حد يجبركم على حاجة.

فرصة كويستا

ساعات كثير بتحصل انك تكون مستنى فرصة تجى لك عشان تحقق حلمك، و لما تيجى الفرصة و تدرسها كويس رغم انها كويستا فى كل حاجة بس مش مناسبة بالنسبة لك، ممكن تجى لك فرصة لوظيفة بمرتب كويس جدا بس مش حتوصلك لهدفك فترفضها، أو يجى لواحدة عريس، ظروفه كويستا و الناس شايفاه كويس و البنات مش حاسة انه حيسعدها و لا هى حتسعده، فترفضه، الناس اللى بترفض فرص بتجيلها مش أغبيا و لا طالبين الكمال، بالعكس ممكن تظهر لهم حاجات اقل من اللى جالهم سواء على الصعيد الشخصى أو المهنى، بس حيالقوا نفسهم فى الفرص الأقل دى و مع الوقت حيعلوها، إيه أهمية إن يبقى مثلا معاك تليفون محمول ب٧ آلاف جنيه و انت مش بتستخدم غير ثلث امكانياته، ممكن يبقى معاك تليفون بمبلغ قليل بس بتستفيد من كل اللى فيه، مش مهم يجيلك فرصة كويستا، اى فرصة كويستا، المهم انك

تقبل الفرصة اللي حتلاقى نفسك فيها و تحس انك عايش
و قابل تعبك فيها بمنتهى الرضا عشان عايزها وحاسسها،
وما فيش حاجة اسمها الفرصة مبتجيش غير مرة واحدة، ده
كلام فارغ، الفرصة الحقيقية هى الحاجة اللي تنور روحك
لما تيجى، غير كدة متبقاش فرصة، اختار اللي تحسه و
تصدقه و يستاهل انك تضحى عشانه، غير كدة خليك على
وضعك.

اعقلها وتوكل

لما بتعدى فترة الواحد يقرر فيها إنه يبعد عن كل حاجة و كل حد عشان يقيم حياته و دنيته و يعرف مكانته عند ناس كان فاكر نفسه مايقدرش يستغنى عنهم، و كان متصور انهم مش حيستغنوا عنه، و يلاقى فى الآخر إن غيابيه مافرقش مع حد والأغرب إن ماحدث فرق معاه و لا زعل على حد ماسألش فيه و لا فرق معاه إذا كان كويس و لاتعبان، عايش و لا راح لدنيا الحق، و فى الآخر ممكن يسمع خبر موته زى الغرب، ساعتها الدنيا بتتغير فى عين الواحد ٣٦٠ درجة بيرجع للدنيا تانى شايل من تفكيره حاجات و اعتقادات و أشخاص و بيبقى زى اللى اتولد من جديد و فاتح دراعاته للدنيا، و نفسه مفتوحة و شال من على ظهره عبء انتظار حاجات كان مستنيها تحصل و محصلتش، و بيبقى عنده رضا غريب، كأنه محزنش يوم، و بيفرح باللى ربنا يبعته لأنه أحسن من اللى كان عايزه، ربنا كريم قوى و رحيم قوى، و فى كل الأحوال بيستجيب

دعاءك لو اتحقق استجاب و لو متحققش برده استجاب،
لأنه منع عنك شر دعوتك، ماتزعلش فى الدنيا على
حاجة و لا حد، ازعل على نفسك بس لو استسلمت لليأس
و بعدت عن ربنا، و خلى عندك يقين فى ربك انه دايم
سندك، و ماتعملش خير وتستنى ثمنه، خلى أجرك على
الله و اعمل اللي انت حاسة حتى لو الكل رافضه، خد
بالأسباب و اعمل اللي عليك، و بدل ما نعلق فشلنا على
شماعة الظروف، لازم نصلح نفسنا الأول و بدل ما نفكر فى
تفاصيل المشكلة، نفكر إزاي نحلها، خلاصة الكلام، اعقلها
و توكل.

خليك قد اختيارك

كان فيه مشهد فى مسلسل بكيزة و زغلول لما بنت الدكتور عمر اللى كانت عايشة برة متضايقه من الزبالة اللى فى الشوارع و جهل الناس و عايزة تروح شوارع نضيصة مع ناس راقية، رد عليها مصطفى متولى الله يرحمه، و قالها: إذا كان فيه ناس جهلة و بيئة و شوارع مش نضيصة، يبقى احنا المسئولين عن ده، الطبقة المثقفة المتعلمة سايبة الناس دى ليه، ليه مش بتنشر الوعى و تعلم الناس، طبعا هى ما عجبهاش الكلام، و أنا متفقة مع مصطفى متولى، احنا فعلا دورنا نعلم الناس و نشر الوعى، بس فيه مشكلة صغيرة، إن الناس رافضة تتعلم أو يحصلها أى تغيير حقيقى، و الفساد المنتشر فى النفوس و قلة الضمير مش حتتصلح فى يوم، حتى لو عملت نظام و قواعد، احنا اساتذة فى كسر النظام و الخروج عن القانون و استخدام ثغراته ببراعة، و كان فيه فيلم لنادية الجندى اسمه عصر القوة، كانت فيه محامية شريفة و مستقرة فى حياتها و ملتزمة بالقانون لحد

ما أخوها اتقتل، فتخلت عن القيم و المبادئ و القانون اللي كانت بتدافع عنه عشان تجيب حق أخوها و تخلى اسم عيلتها زى ما هو قوى، يعنى حتى المتمسكين بالمبادئ نتيجة الضغط ممكن يتغيروا للأسوأ و ضميرهم مستريح، و دى الحجة اللي بيتحجج بيها كل الناس تقريبا، الدنيا كلها كدة و مشى حالك و انت يعنى اللي حتقف تدافع عن الحق لوحدهك، فبتكون النتيجة إن حتى لو كان حد عايز يعمل حاجة كويسة أوبراعى القانون، مافيش حاجة حتساعده يعمل كدة لا ناس و لا ظروف، و الناس اللي عندها ضمير مش حينفع تقفل بيوتها و توقف مصالحها لحد ما الوعى ينتشر، و الناس تفهم إن الغلط غلط حتى لو الكل عمله، و اللي اضطرته الظروف انه يغير ذمته و قال ان ده وضع مؤقت لحد ما الدنيا تتظبط و خارج زى الأول نضيف، مش حيعرف و حيفضل تاريخه الأسود مطارده، فبيكمل فى الغلط برضه و ضميره مستريح، و يقول ما حدش ساعدنى اتوب و ارجع و طول الوقت متهم و مُدان، و طالما فى كل الأحوال صورتى زى الزفت، فخلينى زى الزفت فعلا مش بالكذب، لو عايز تغيير لازم انت نفسك تتغير، و تتحمل أشد أنواع النقد و المحاسبة و اللوم لأنك لو فعلا صح مش حتتساب فى حالك وحتتحارب من القاصى و الدانى، و الدنيا مش وردى و لا عمرها حتكون وردى، و إذا ضحكت بتضحك ساعة و تضلم باقى السنة، هى دى الحقيقة، و لازم

نبقى عارفين إننا حنتعب و لازم حنتعب، ده حتى الأنبياء
كانوا أشد الناس ابتلاء، و حيلى يوم القيامة نبى و معاه
مؤمن واحد و نبى تانى معاه اتنين و نبى ثالث معهوش
حد، يعنى الدنيا مش سهلة، و لا عمرها حتكون، كل
واحد طائرته فى عنقه و كل واحد حيتحاسب على عمله،
استسلامك لليأس أو للغلط ما حدش حيدفع تمنه غيرك و
برضه صبرك و تحملك لحد ما تاخذ اللي انت عايزه مش
حيضيع على الفاضى، يوم ما تختار طريق تمشى فيه، لازم
تبقى متأكد إن ده الطريق اللي انت مؤمن بيه و عايزه، و
مستعد انك تتحمل كل تبعات اختيارك مهما كانت سيئة،
خليك قد اختيارك.

غريال الحياة

الواحد كل ما الوقت يعدى ، خلقه بيضيق و مايبقاش عنده صبر، و بيستتفه حاجات كتير كان فاكلها مهمة فى حياته، اللي بيكبر عقله بيكبر معاه و بيبقى عنده قدرة انه يستغنى عن حاجات كتير جدا، الواحد مش بيكبر بمرور الزمن بس، بيكبر كمان بمرور الناس و التجارب، عشان كدة ماتزعلش من أى تجربة فشلت فيها، أو ظلم اتعرضت له، أو حاجة كانت معاك و راحت منك، لأن فى كل الحاجات دى دروس أكيد اتعلمت منها و عرفت معادن الناس و قيمة الحاجات اللي حواليك، ماتجربش ورا حاجة مش حتتنفك و حتضيع عليها وقت و مجهود و فى الآخر تضرك، ماتستسلمش لياسك و إحباطك و واجه نفسك و اعترف إن ممكن اختيارك كان غلط و العيب ماكنش فى الظروف، كفاية مبررات وتكاسل و هروب من الأسباب الحقيقية لفشلنا، طول ما احنا بندى مبررات لأخطائنا، عمرنا ما حنتغير، طول ما احنا بنطارد حاجات ماينفعش

تكون لدينا، نحنس بالعجز واليأس زيادة، طول ما احنا مش عارفين قيمة الحاجات اللي معانا، مش نحنس بحلاوة أى جديد فى حياتنا، طول ما احنا عايشين دور الضحية على طول، عمرنا ما حنشوف عيوبنا و لا تقصيرنا و لا عمرنا حنصلحه، الكل محتاج يراجع حساباته من غير مكابرة وعند سواء اللي حياته مستقرة و محتاج يكسر الروتين عشان يشوف الدنيا جرى فيها إيه، أو اللي حياته ملخبطة و مش عارف يحقق أى حاجة، حياتنا عايزة تتغربل كويس قوى و لازم يكون عندنا الشجاعة الكافية عشان نطرد أى حاجة و أى حد ملوش لزمة فى حياتنا.

أداة

الغضب أداة، و الحزن أداة، حتى اليأس أداة، كل مشاعرنا، أدوات فى أيدينا وتحت إرادتنا، المفروض احنا اللي نتحكم فيها، مش هى اللي تتحكم فينا، و احنا اللي لازم نعتبرها مجرد أدوات لعبور الأزمة مش نفضل محبوسين جواها، لأن الدنيا رغم كل مشاكلنا و ظروفنا الصعبة أوسع بكثير من دايرة الهم اللي احنا حابسين روحنا فيها، فى حاجات كويسة احنا لسة ما عرفناهاش، ما بنحاولش أصلا ندور عليها، و خايفين نمشى طريق ما نعرفش نكمله، فبنترجع، بعد ما نكون مشينا فيه شوية و يمكن نكون حققنا إنجازات بسيطة بس نتيجة عدم رضانا عنها بنعتبر اننا ما حققناش حاجة و هنا لازم نقف نراجع مواقف و أحداث و معدل تنفيذ، و أهم من ده كله نواجه تقصيرنا بشجاعة عشان لما نختار سكة نمشيها، يبقى عندنا القدرة نتحمل مسئوليتها للآخر، بعد ما نكون عالجننا التقصير اللي حصل قبل كدة، و أهم من أى حاجة عدت إن الطريق اللي حنختاره، نبقى متأكدين اننا عايزينه فعلا و مستعدين نكمله للنهاية.

دفاترنا القديمة

أنا عمرى ما قلت إن الظروف حلوة و الدنيا وردى و
جميلة، بالعكس، دى منيلة بستين نيلة و زى الزفت و
أنا أول واحدة حاسة بده دلوقتى، و عمرى ما مريت فى
حياتى بحالة إحباط مهببة زى اللى أنا فيها حاليا و الدنيا
مقفلت من كله و ماليش نفس اعمل أى حاجة، بس أنا
باعترف انى فى نفس الوقت مش قادرة استسلم للإحباط،
فيه صوتين جوايا بيتخانقوا مع بعض، صوت الموت و
الكسل و الخوف من بكرة و صوت تانى بيصرخ، بيقول
لى طول ما فيكى الروح، ماينفعلش تسكتى و تستسلمى،
يمكن تكون كل الطرق اتقفلت بس الطرق ماخلصتش و أنا
عندى قناعة إن أنا ماعملتش كل اللى علىّ أو كان فيه
غلط فى التنفيذ، اكتشفت ان مش كفاية يبقى عندك حلم
عايز تحققه، ولا حتى كفاية انك تدق كل البيبان، لأن
ممکن فعلا بعد ما توصل للحلم تلاقى ان مش ده اللى
انت كنت عايزه، هو احنا عايزين ايه من الحلم غير اننا

نحقق ذاتنا من خلاله، و لما نقف قدام ربنا نلاقي حاجة نتحاسب عليها، عشان كدة الكلام مابقاش له لزمة، خلص زمن الكلام، و انا رغم انى مش عارفة ايه اللى مكتوب بكرة و لا حكمل فى انهى سكة، بس مايكنش الحل انى اقعده ساكتة و مستسلمة لحالة الموات دى، كل اللى اعرفه الأيام دى إن دفاتر حياتنا القديمة لازم تتفتح و ندور فيها على حاجات كنا رامينها عشان السكنينة سرقتنا، حنلاقي حاجات كنا بندور عليها و محتاجينها حاليا و هى اللى ممكن تطلعنا من كل السكك المقفولة أو اللى يمكن ماكنتش موجودة أصلا و احنا ضيعنا فيها وقت و مجهود و أعصاب و فى الآخر ماوصلتناش لحاجة، احنا محتاجين و أنا أولكم نعيد تفكيرنا فى حاجات كتير آخرها ظروف البلد المهيبة، الشماعة اللى بنهرب بيها من مواجهة الحقيقة.

فرصة سعادة

السعادة و العلاقة غير المشروطة غالبا هي اللي بتنجح لأن مافيهاش خنقة و لا قيود و لا انت بتعمل حاجة و مستنى تاخذ ثمنها، بتعمل الحاجة عشان عايز تعملها وبتكون مع شخص انت عايز تكون معاه و بتسعهه عشان لما انت بتكون سبب سعادته بتكون فرحان إن حد بتحبه سعيد بوجودك جنبه، لكن عمر الخنقة و الحبسة و المطاردات و عدم الثقة تقدر تنجح أى علاقة، بالعكس بتقلل الحب و تخلق نفور و رغبة فى الابتعاد لأنه بيكون حمل و سبب ضغط، و ده اللي بيخلى ناس كتير جدا خايفة ترتبط، بتبقى عايزة تعيش الحب من غير ما تتحمل مسئوليته، خايفين منها، عشان كدة الحب الحقيقى اللي فيه ثقة و مودة و رحمة و بُعد نظر هو اللي بيعيش و بيبقى كل طرف متحمل مسئولية دوره فى العلاقة، عارف امتى يبعد و امتى يقرب و يفهم إن كل طرف له مساحته و حدوده اللي حتى اقرب الناس ماينفعش يعدوها، ماتترددش فى انك تخطف فرصة سعادة حقيقية لو ظهرت عشان خايف من المسئولية و مش واثق فى نفسك، السعادة تستاهل تغامر عشانها.

حتة ناقصة

لما بتعيش و جواك حتة ناقصة، ده بيؤثر على تركيزك و جودة أدائك، و دايمًا بتحس ان اللي بتعمله، بتعمله عشان مضطر تعمله، مش عشان عايز فعلاً تعمله، بتشتغل أى شغلانة عشان لازم تشتغل و ده اللي لقيته، بتتجوز أى جوازة عشان دى سنة الحياة مش عشان الشخص فارق معاك، بترضى والدك ووالدتك برًا بيهم مش مقتنع باللي بيقولوا لك عليه، بتنفذه و خلاص، فعمرنا بيخلص و احنا عمالين نجرى عشان نرضى كل الناس و نعمل كل حاجة إلا إننا نرضى نفسنا و نسعد روحنا، عايشين عملية استنزاف مستمرة، استنزاف للوقت و الأعصاب و الفلوس و المجهود و المشاعر، بنمشى فى سكك غلط و نرجع من نص الطريق، و المفروض منزعلش من حد اتخلى عننا فى محنة، اذا كان اتخلى عن نفسه من الاول خالص، حنزعل منه انه سابنا، هو من البداية لما اختارنا مكنش مقتنع، احنا اللي السكة حدفتنا فى طريقه و لو كان وقتها لقي حد احسن مننا مكنش اختارنا، و احنا كمان لما بنختار حد أو حاجة اساسا

مش بنختار، بناخد اللي نلاقيه ، يعنى برضه ماينفesch حد يلوم علينا يوم ما نلقى حاجة أحسن نرمى القديم فى الزبالة و ناخد الحاجة الفبريكة ، فيه فرق كبيبيبيير جدا بين الحاجة اللي محتاجها وأى حاجة تغطى الاحتياج ده حتاخذها و بين حاجة انت عايزها حتى لو مش بتغطى كل احتياجك ، قابلها بعيوبها و حتاخذها بس عشان عايزها مش عشان مافيش قدامك غيرها ، بلاش نعيش بحتة ناقصة فينا حتى لو اللي حيكلنا مش كامل و كل الناس حتعيّب عليه ، كل واحد له وجهة نظره ، احنا مش عايزين احسن حاجة فى الدنيا و لا نعيش مع شخص كامل من مجاميعه ، احنا عايزين الحاجات و الأشخاص اللي حنلقى معاها و بيها و ليها نفسنا ، غير كدة حتفضل جوانا تحت ناقصة كتير لا حيكلها فلوس و لا إمكانيات و لا أنبيا مرسلين حتى .

على الأرض

الناس اللي زعلانة من حياتنا و أخبارنا بقت على الفيس و أمة لا إله إلا الله بتشوفها و بتعرفها، أحب أقول لهم إن حتى لو كانت المسألة دى عند البعض بتبقى زيادة حبتين ففى الأول و الآخر، ده موقع افتراضى صحيح فيه اللي بيحقد و اللي بيحسد و اللي بيخرب بيوت، بس فى الآخر ممكن ب بلوك و لا ديليت الموضوع يخلص، الدور والباقي بقى على التدخل اللي مش افتراضى، التدخل الحقيقى اللي فرضته العادات والتقاليد المتخلفة، زى العروسة لما تتجوز لازم كل اللي يزورها يتفرج على البيت حنة حنة و الهدوم اللي اشتريتها و الحاجات اللي المفروض انها خاصة و ماחדش يشوفها تبقى عيب لو ما فرجتش الناس عليها، و الأسئلة اللي مالهاش معنى، و بيسألها ناس فضوليين بحكم القرابة، و يبقوا عايزين يعرفوا حاجات مش من حقهم يعرفوها، و أسرار البيوت اللي بتطلع فى قعدات النميمة و النفاق اللي بين الناس و الوشوش اللي بنبلسها عشان نجامل و نعمل حاجات مش عايزنها، و الناس اللي تقعد

تسأل و تحلل انتِ متجوزتيش ليه و انتِ ماخلفتيش ليه و
انتِ اطلقتِ ليه ، حياتنا بقت مشاع من قبل الفيس بكتير
و اللي بيحصل على الفيس هو صورة تانية للي بيحصل
فى الواقع من سنين ، وقبل ما نتكلم على الفيس و الضوابط
بتاعته لازم على الأرض حاجات كتير تتغير ، وما تكسفش و
لا نخاف نضايق حد لو اتمسكنا بحقنا فى الخصوصية ، و
ان حياتنا ملكنا وخاصة بينا و مش من حق أى حد يعرف
غير اللي احنا عايزينه يعرفه مهما كانت صلته بينا ، أما
بالنسبة للفيس و مواقع التواصل الاجتماعى عموماً ، فالأفضل
إن أخبارنا ماتبقاش مشاع فيه لأن للأسف مش كل الناس
حتتمنى لنا الخير أو حتفرح لنا .

محطات فى حياة بعض

الحكاية دى حصلت كتير الفترة اللى فاتت، إنى أقابل ناس و اتعامل معاهم و بعدين بلا مقدمات ألقى نفسى بابعدهم و مش عايزة اتعامل معاهم، هما ماعملوش حاجة وحشة فى حقى و لا حاجة حلوة، بس يمكن الفكرة انى مالمقتش نفسى وسطيهم، أو يمكن لقيت نفسى باضطر اعمل حاجات مش مقتنعة بيها، مش أنا، و بدل ما أواجههم و أقول لهم الكلام ده أو ابقى لازم أدافع أو أدى أسباب للبعد ده، بعدت و اختفيت من مشهد حياتهم بهدووووء شديد، و مع الوقت بتأكد إن قرارى كان صح، فيه بعض الناس بيبقى وجودهم حمل زيادة فى حياتك، مش حيحقق لك أى إضافة على كل المستويات و لا انت حتبقى بالنسبة لهم إضافة رغم كل مزيك اللوزعية، يا ريت ماحدث يزعل منى لو كان حصل معاه كدة، و لا انا حزعل من حد لو عمل معايا كدة، و حاقدرد جدا إن جاتله الحالة دى، و انه ماشفش فى تعامله معايا أى إضافة له، عادى، حصلت

و بتحصل وحتحصل، معانا كلنا، يعنى من الآخر اوعى
تعاتب حد قرر يخرج من حياتك بدون إبداء أسباب لأنه
لو عاتب أو شرح مش حيفيد بحاجة لأنه فى كل الأحوال
مقرر يمشى، فكثر الكلام مالوش لازمة، و انت لو قررت
تفارق حد يبقى أكيد رغبتك فى الفراق بتكون أقوى من
الرابط اللي رابطك بيه، فى الآخر حنكتشف إن الناس
المهمة فى حياتنا و الناس اللي ماينفعش يومنا يكمل من
غيرهم يتعدوا على صوابع الإيد الواحدة، و إن أغلبنا إذا
ماكنش كلنا، محطات فى حياة بعض.

علاقات سوية

ساعات كتييير جدا بتبقى العلاقات الإنسانية معقدة و مؤذية جدا، سواء كانت قرابة، صداقة، زواج، أم وابنها، العلاقة بيبقى فيها شد من ناحية واحدة، تلاقى طرف متحمل المسؤولية كلها و كل حاجة فوق نفوخه و بيتصور انه ضحية و ماحدش حاسس بيه و انه مستنفذ، و مستغل و مش متقدر صح، و الطرف التانى مرتاح ٢٤ قيراط، مبيعملش حاجة، بياخد بس، بيمص دم و طاقة شريكه، مبيتحملش مسؤولية و لا بيتعب نفسه فى التفكير، و برضه بيعتبر انه ضحية لما بيجى يواجه الحياة و يكتشف انه مش عارف و انه اتكالى و مش عارف يجيب لنفسه كوباية مية سقعة، فبيحمل الطرف التانى مسؤولية ده، و انه ماعلموش يواجه الحياة لوحده من غيره، طبعا الاتنين مش ضحايا، الاتنين غلطانين، الطرف الأول غلطان لما اتحمل كل حاجة لوحده و ماكنش راضى يحمل الطرف التانى أى مسؤولية بحجة انه بيربحه أو بحجة انه مبيعرفش يعملها أو انه حيبوظ الدنيا فبيتحمل فوق طاقته، عشان يستموت فيها

و ماحدث يغلظه ، و ساعة الحساب يقعد يقول انا باعمل
و اسوى عشانكم ، و الطرف التانى غلط لما استسلم للراحة
دى و فرح بيها و ماأدركش إن حيجى يوم يواجه الحياة
لوحده لأن الطرف الأول ممكن يسيبه لأى سبب اختلفوا أو
سافر أو ساب الدنيا و مات ، و كمان استسلم للطرف الأول
اللى شايفه على طول متهم و مقصر و خايب مايعرفش
يعمل حاجة و سلم بالاعتقاد ده عشان يهرب من المسؤولية
و مايتعلمش حاجة ، فهو فى الآخر مش ضحية ، هو اللى
رفض يشيل الحمل لما لقى حد تانى شاله ، فيلبس فى
الحيطة ، عشان كدة ماينفعش فى علاقة أيا كان نوعها
يبقى طرف عمال يدى من غير حساب و طرف بياخد من
غير حساب ، أى علاقة فيها هات و خد و ماحدث ضحية ،
اللى بيرضى بدور الضحية بيبقى بمزاجه واختياره ، و كل
واحد لازم يبقى عارف دوره و محددده و متحمل مسؤليته ،
عشان تبقى العلاقات سوية.

كلام كويس

احنا بنقول كلام كويس قوى، بس الغريب بقى إن لما بتيجى مواقف مش عاملين حسابها، و من المفترض إننا ننفذ الكلام اللى بنقله بنضرب لخمسة و مش بنعرف نتصرف، و بعد الموقف ما يعدى و نقعد نراجع اللى حصل، نقول لأ، انا كان المفروض اقول كذا أو اعمل كذا، انا ماكنش ينفع اسكت، انا ايه اللى كتمنى؟! و تبقى عايز تحدف روحك بحاجة، اللى بيحصل ببساطة إن فعلا انت بتبقى عارف اللى المفروض يتعمل، بس عنصر المفاجأة بيربكك، و الذهن ماكنش مستعد للموقف فبتنسى الكلام أو بتتصرف تصرف أهبل يمكن لا يناسب سنك و لا خبرتك، و تلاقى كدة اللى حواليك استغربوا ويمكن قعدوا يتريقوا، و يقولوا بقى ده اللى خاربها و مقطع السمكة و ديلها، و ماتخلصش من البهدلة، حل الموضوع ده ببيجى بالتدرج و الممارسة، يعنى فكرة إن الذهن دايمًا يكون حاضر، و لو فيه موقف معين قلقك، اعمله بروفة كذا مرة قدام المراية، لوحدك

طبعاً لا يقولوا عليك اجننت فى البيت، و لو حصل الموقف فعلاً حتلاقى عقلك مسبقاً اتعامل معاه كتير و توقع ردود الأفعال، و عنده قدرة أحسن انه يتعامل مع أى رد فعل مفاجئ، مع الوقت حتلاقى المسألة بقت سهلة جداً و عندك قدرة كويسة جداً انك تقلب أى موقف لصالحك، أهم حاجة التركيز و الذهن الحاضر و عدم تأنيب الضمير على أى موقف بايخ اتعرضت له، اللى عدى عدى، بس المهم انك تتعلم منه.

كن بجوار الرامى تنج

ماشى فى سكة لوحديك، بدأتها لوحديك وحتكملها لوحديك، وحتنهيها لوحديك، مايفركش كتر الناس حواليك، عشان فى المحنة حتلاقى نفسك لوحديك، و لا يفرك كتر الحبايب عشان لو لقوا بديل أحسن حيسيبوك و يروحوا له، و لا يفرك كتر الفلوس عشان فى لحظة ممكن تروح أو انت تروح و الورثة ياخذوها على الجاهز، و لا يفرك جمالك لأنه مش دايم، و ما يفركش الصحة عشان ممكن شوية سخونية يرقدوك فى البيت، الإنسان ضعيف، ضعيف جدا، و قبل ما يبص للنعم اللي عنده، لازم يفكر اللي إدى له النعم دى، إداها له لحكمة و لأداء و وظيفة محددة و دور معين فى حياته، و لما يخلص الدور ده حتروح و يجى غيرها، أو هو شخصيا يروح لما دوره فى الدنيا يخلص و الدنيا مش حتقف عليه، ماينفعش تعتمد على حد و لا على حاجة، لازم تعتمد على نفسك عشان مافيش حاجة دايمة لك، و اللي ربنا اداه لك، إداه لك بقدر و اللي خده برضه بقدر و اللي منعه، منعه بقدر، و اذا اشتكيت من الوحدة و قسوة الدنيا و سهامها الكثير فى ظهرك، كن بجوار الرامى تنج.

عفريت الزبالة

كنت باتفرج على حلقة للدكتور مصطفى محمود و كانت بتتكلم عن قدرة ربنا فى انه يخلق لمخلوقات ضعيفة حيل عشان تتخفى و حيل تانية عشان تهاجم الفريسة، اكثر حاجة لفتت نظرى حشرة اسمها عفريت الزبالة، يعنى لو قدامك كوم زبالة حلو كدة و بتبص عليه، تلاقى جزء منه بيتحرك، الحشرة دى بتعمل ايه، بتتعمد تغطى نفسها بالزبالة و تفضل ساكته لحد ماتيجى الفريسة تقف مش واخدة خوانة تقوم الحشرة دى منقضة عليها، فيه ناس كتير جداااا، زى الحشرة دى لازم يغطوا نفسهم بالزبالة و يلبسوا اقنعة زبالة عشان ياخدوا اللى هما عايزينه، الحشرة دى واضحة جدا و الزبالة اللى عليها واضحة جدا، لكن الناس زبالتها جواها، مستخبية و خبيثة ماتبنش غير فى المواقف و قلة الأصل و النذالة و المصلحة، الحشرة دى لو اتشالت الزبالة من عليها مش حتعرف تعيش إلا إذا توفر عندها مصدر تانى لنفس نوع الغذاء اللى بتاخده، فساعتها

حتتكيّف مع أى ظروف جديدة و بالتعود حتتغير، بس
أساسا حصلها إشباع لاحتياجها الأساسى، و الناس نفس
الحكاية، مش حتتنصف من جوة إلا إذا أخذت اللى هى
عايزاه من غير لف و دوران و طمع و قلة أصل، ساعتها
حتتكيّف طالما حصل لها إشباع حقيقى بطريقة نضيفة و
شريفة، ما أكثر الطرق القذرة اللى ممكن توصل بيها لهدفك
من غير مجهود يذكر بس عمرك ما حتتنسى انك وصلت
لهدفك بطريقة غلط و لا كل نجاح و فلوس الدنيا حيرجعوا
احترامك لنفسك لو خسرتة، مافيش إنسان اتولد سئ أو
شيطان و لا اتولد ملاك، اتولد فى حرب دايرة جوة نفسه
عشان يغلب خيره شره، و ربنا فاتح باب التوبة حتى
لو اضطررنا الظروف للتحايل و المكر و المرونة بس مايكنش
على حساب الأخلاق و الفطرة و إننا نفضل من جوة نضاف
و ضميرنا مرتاح، طريق الهدف لما يبقى طويل و شريف
احسن مليون الف مرة من انه يبقى قصير و غير شريف.

قبل الأوان

واحدة شافت صاحبته بقالها سنين ماشافتهاش، واحدة منهم اتجوزت بعد التخرج والتانية لسة ماتجوزتش، المتجوزة دى كل ما تشوف وش صاحبته اللي متجوزتش ولا تكلمها فى التليفون تقولها شدى حيلك، عايزين نفرح بيكى و اتساهلى شوية ماتعقديهاش، مش ده المشكلة، عادى موقف بيحصل، اللي مش عادى بقى إن البنت اللي مش متجوزة لما شافت صاحبته المتجوزة بعد سنين و هما الاتنين مكملوش ٣٠ سنة، حمدت ربنا انها ماتجوزتش، اقسام بالله العظيم لما شافتها كانت اكبر من سننها بيغى ٢٠ سنة ووشها معجز و الهم راكبه، وفرحت جدا انها ماشلتش هم يعجزها بدرى و يخليها ميتة و هى عايشة، إيه أهمية الجرى ورا الجواز واننا نحفظ كتاب كيف تصطادين عريسا عشان بعد كدة ندبس فى حد، آه كويس بس ماينسابناش و نعجزه و نعجز معاه، و نلومه و احنا اللي وافقنا عليه، فى الآخر العزوبية هم و الجواز أكبر هم و اللي ناوى يشيل

حمل الجواز لازم يكون قده و قد مسئوليته و الا يبقى هم
العزوبية ارحم بكتير، و عشان مافيش قواعد محددة و ممكن
الجواز و النصيب يجوا على اهون سبب، لازم يكون الواحد
مستعد دايمًا ان الموضوع ده ممكن يحصل فى اى لحظة، و
اهم خطوة للاستعداد انك متبقاش فى حالة تحفز و انتظار
لأى خطأ للطرف التانى عشان تلعب دور الضحية و تعجز
روحك بدرى، لو معرفتش تطلع الحلو اللى فى شريك
حياتك، عشان تتحمل الوحش اعرف ان ده مش نصيبك و
إن كملت يبقى بتنتحر، هم العزوبية أحسن بكتير من هم
جوازة غلط بتعجز اصحابها قبل الأوان.

دايما فيه جديد

كل حاجة فى حياتك مادية أو حسية بتاخذ كل يوم بُعد مختلف فى حياتك، حتى لو انت شايف انها روتين كئيب مش بيتغير، لأ هو بيتغير، حتى المكتب اللى انت بتتعد عليه فى الشغل، بيتغير، بيجى عليه تراب و بتمسحه أو مش بتمسحه و يفضل التراب يتكوم عليه، كذلك مخك و مشاعرك و تفكيرك، يا تمسح تراب الهموم اللى بيتكون عليهم كل يوم يا تسيبه يتراكم و يقتلك، فى كل الأحوال انت لازم حتتغير، حتحب حاجات، حتكره حاجات، حتظهر فى حياة حد، حتختفى من حياة حد، حتفرح أو حتحزن، عشان كدة مافيش حاجة اسمها يوم عدى و مافيش جديد، هو دايما فيه جديد، بس احنا مش بنبص له، و لو كانت الحاجة اللى بتتغير بتبقى للأسوأ لازم نلحق روحنا قبل ما تنطفى، و العكس لو حاجة كويسة نركز عليها، و زى ما تشوف نفسك حتكون.

الانبساط

ساعات بنعمل حاجات بنبقى عارفين انها حتؤذينا بس بنعملها بمزاجنا عشان ننسط بيها، ماينفعش نيجى بعد كدة نعيط و نقول اتأذينا ليه، احنا كنا عارفين إن الاذية دى تمن الانبساط اللي اخدناه، بس الفكرة إن الواحد مايبقاش مقدر الموقف غير لما يعيشه بجد، أو يمكن كان منتظر نتيجة مختلفة غير اللي كان متوقعها و الدنيا كلها قالت له عليها، عشان كدة لما نيجى نعمل حاجة، نبقى عارفين نتايجها كويس، عشان منلومش حد ملوش ذنب.

ترتيب ربنا

عملت اللي عليك، خلصت كل الحيل و دعيت ربنا، خلاص كدة دورك خلص، الحاجة اللي انت هديت الدنيا عشانها، لو مكتوبة لك، ربنا حي جيبها لك فى وقتها المناسب اللي هو شايفه مش اللي انت عايزه، أما لو مش كاتبها لك رغم كل اللي عملته، يبقى ماتزعلش على حاجة ربنا مش كاتبها لك لأنها لو خير كان كتبها من نصيبك، ماحدث يستعجل، ماحدث حياخد غير نصيبه لا أقل ولا أكثر، ثق فى ترتيب ربنا، كل شئ فى أوانه حلو.

مرحلة جديدة

كأ حادثه حصلت كنا فأكربنها نهأفة و كانت بءأفة ؟! كم ءء ءرء من ءآأنا و كنا فأكربن مش ءنقءر نعش من ءبوره و لا نقءر نستعنى عنه و لقبنا الءفة اسءمرء و موقءش ءلبه؁ بالعكس ءه الءبنا اءلوء بعء ما اءءفى منها. ءأبما فى قءر ربنا؁ لطف ءفى؁ ءلى ءنءك ءقة فى ءرءببه؁ و الءآة أو الشءص اللى اءءفوا من مشءء ءآأءك؁ لو كان فبهم ءبئر لبك كانوا فضلوا بس اءءفاءهم معناه إن فبه مرءلة ءءبءة ءءبءأ فى ءآأءك؁ وان اللى فات اءءهى و لازم ءنساها.

إيه مختلف

عمرکوا شفتوا شاب فى بداية حياته، لسة متخرج مثلا، و حد جه سألہ نفسك تعمل ايه فى مستقبلک، یرد یقول انا عایز اتجوز و اشیل مسئولیة و اربى عیال، عمرها ما حصلت و عمرها ما حتحصل، لیه بقى، لما البنات بتتحت فى نفس الموقف و تتسأل نفس السؤال، الناس تستغرب و تنتدهش و یمکن تزعل لما تقول انها عایزة تشتغل و تثبت نفسها فى مجالها، لیه لازم یبقى ردها اتجوز و یبقى عندى ولاد، لیه دى الإجابة الطبیعیة، على فكرة الجواز و الاولاد دى فطرة ربنا خلقها عند الاثنین الرجل و الست، لا هی محتاجة سؤال و لا محتاجة انها تبقى رد سؤال، اللی محتاج یتسأل علیه انت حتعمل ايه مختلف، انت حتغیر ايه فى حیاتک و حیاة اللی حوالیک، لكن احنا بما إننا فى مجتمع رجعی، الدنیا عنده بدايتها و نهايتها وأولها و آخرها فى الجواز و العیال و الهم والغلب، لحد ما خلوا الجواز فقد معناه، و لو بنت اتأخرت فى الجواز تبقى مصیبة سودة، حتى الرجل اللی ماکنش حد بیعرف یکنمه

ماخلصش من تلقيح الكلام، مافيش فايده، الحياة فيها حاجات كتير غير الجواز ممكن الواحد يعيش عشانها، لازم يلاقى نفسه الأول عشان يقدر يلاقى شريك حياته، عشان كدة مش جوازة و خلاص و لا أى واحدة مناسبة و خلاص و لا حيبقى كل همنا اننا نتجوز، و لما بيحى النصيب ماחדش حيمنعه، و لحد ما يجي عيش لنفسك، حبها، لأنها تستاهل تتحب، و اخلص لها، نميها و طورها و مايهمكش من كلام الناس، كدة كدة مش حيبطلوا كلام، و مترضاش بحد يقتلك و يقتل طموحك و يدفنك بالحيا، و يدمر كل اللي عملته، عشان مش عاجبه أو بيغير منك أو مش قادر يتحمل نجاحك، الحب اللي يجيبك ورا بناقص منه، و الجوازة اللي تعجزك بدرى، ماتكملهاش، انت اللي بتقرر سعادتك سواء بالجواز أو بالعزوبية، كل حالة لها حلوتها و عيوبها، مش مهم تتجوز امتى، المهم لما تتجوز تبقى راضى و مش كل أحلام البنى آدم تنحصر فى الجواز، مافيش حد مش عايز يتجوز، المهم لما تتجوز تتجوز صح و لما تعمل حاجة تبقى عايزها بجد، غير كدة مايهمكش.

نفسك وبس

لما اللي قدامك يفهمك غلط بيبقى أحسن من إنك تقعد تفسر في وجهة نظرك اللي ما حدش حيفهمها ولا حيقدرها، عشان كدة ماتشرحش لحد حاجة ولا تتخيل انك داخل معركة و مافيش معركة أصلا، سيب اللي يفهم يفهم و اللي مافهمش، خليه مش فاهم أحسن، وإذا كان على منظرك قدام الناس، انت دايمًا قدام الناس مُدان و مقصر و لسة صغير و مش عارف تعمل حاجة، و مش متحمل للمسئولية و فاشل، فمهما عملت مش حيغيروا فكرهم لما تتكلم من هنا لبكرة، عشان كدة اعمل اللي انت مقتنع بيه و بس والنجاح اللي حتوصله هو اللي حيسكت أى حد، و لما حد يتفزلك من نفسه و يتصور انه بيخدمك بتدخله الزيادة في حياتك و فاكر انه خايف على مصلحتك، هو بيؤذيك مش بينفعك، في لحظة معينة حتلاقى نفسك بتبعد عن اقرب الناس ليك بمزاجك، مش عايز تحكى و لا تتكلم، و اللي واجعك مش حتقوله لحد و اللي يفرحك برضه مش حتقوله لحد، لأن ما حدش حيرفع عنك الأذى و لا حيقدر يشاركك

فرحك، مابقتش كل حاجة ينفع تتحكى، كل واحد بقى له
دنيته الخاصة بيه جدا، اللي ماحدث بيشاركة فيها مهما
كان قريب منه وبيحبه، مساحة من الخصوصية ماحدث
يقتحمها و مع الوقت و الخبرة والعمر، مساحة الخصوصية
بتزيد و دايرة المقربين بتصغر جدا، ممكن تنعدم خالص لما
فعلا ماتلاقيش حد يقدر يفهم طبيعة خصوصيتك، أو تلاقى
كل اللي حواليك عايزينك نسخ منهم مش حاجة خاصة
بيك و بيعتبروك غلطان عشان مش زيهم، بيفتكروك عايز
تبقى مختلف، تقليعة أو ادعاء، لكن انت فعلا مختلف،
مش شبه حد و لا مطلوب انك تبقى شبه حد و لا تبقى
امتداد لحد، انت مطلوب منك انك تكون نفسك بس، هي
دى الحاجة الوحيدة اللي تستاهل انك تقلب الدنيا عشانها،
لكن ماتضيعش عمرك و وقتك وأعصابك عشان تثبت إن
غيرك غلط أكثر من إن انت صح، انت صح من وجهة
نظرك، و حتتحمل نتايج ده بمنتهى الشجاعة حتى لو
طلعت غلط فى الآخر أو موصلتش لحاجة و لو اكتشفت
انك كنت غلطان لازم تكون شجاع عشان تواجه الغلط ده و
تصلحه مش عشان تعتذر للى حيشمتوا فيك و هما بيبصوا
لك بابتسامة صفرا و يقولوا لك: لو كنت سمعت كلامنا
ماكنش حصلك كذا و كذا، انت برضه حتصحح مسارك
مش عشان حد غيرك، ماتبقاش حد تانى غير نفسك،
نفسك و بس.

هوجت كدابة

منى زكى لما كانت مع منى الشاذلى، قالت كلمة عجبتنى قوى، قالت انا باهتم انى اعيش اللحظة اكثر ما يهمنى انى اسجلها، وهى عندها حق، احنا بقينا بنسجل ونصور أفراحنا واحزاننا حتى خشوعنا فى الصلاة، اكثر ما بنعيش اللحظة، بيبقى هدفنا البوست حيعمل كام لايك وكومنت، مش عشان حتى الناس تشاركنا اللحظة وبتكون النتيجة يا حسد يا حقد يا تشفى، مع الوقت الناس حتبطل تعمل نشر لحياتها الخاصة على مواقع التواصل، وحتبقى فى وقت من الأوقات موضة و هوجة خدت وقتها و خلصت زى كل حاجة فى حياتنا دلوقتى، هوجة كدابة، ولما الناس بنفسها تكتشف حقيقتها، حتبطلها، و حنرجع لحياتنا القديمة، اللى كنا فيها بنعيش اللحظة و ما بنسجلهاش.

دنيا

حنعرف مع الأيام إن مش كل حاجة لازم نقف عندها و لا أى حد يستاهل انك تضحى عشانه و لا أى حاجة تستاهل انك تبادر عشانها أو تخاطر بسببها، و لما تيجى تختار طريق تمشييه، عارف انك حتتعب فيه لازم تبقى متأكد إن مهما كانت النتائج حتتحملها، عشان فى كل الاحوال لازم حتتعب و فى أوقات كتير حتلاقى ان الحاجة اللى انت عايزها ابسط بكتير من الهوليلة اللى انت عاملها لروحك سواء كانت الهوليلة دى فرح أو حزن و ممكن أصلا اللى انت عايزه و حتموت عليه لو اخدته مايجيرش فى حياتك كتير و يمكن يغيرها للأسوأ، عشان كدة الدنيا عمرها ما حتقف على حلم واحد أو شخص واحد، بالعكس الدنيا أوسع بكتير جدا من تصورك، أوسع من البحر ده كله، ماتسجنش روحك، و لا قلبك و لا أحلامك، و عشان روحك تستاهل كل خير لازم أحلامك تبقى حاجة تستاهل متضيعش عمرك على كلام فارغ، و متستعجلش اسعى براحتك بس

مش كل فرصة تبقى كويسة و الهداية ما بتحدفش كتاكيت و
ما حدش بيعمل حاجة من غير ثمن و لما اللي قدامنا بيعمل
روحه حدق بنفوت بمزاجنا مش عشان هو ناصح، و طول
ما احنا فى الدنيا حنشد فيها و حتشد فينا لحد ما نوصل
للى احنا عايزينه، هى كدة، دنيا.

اشترى دماغك

ماتحاولش تتمسك بحاجة مابتعبرش عنك أو بحد
مش شايفك غير فى المصلحة، ماتضيعش وقتك مع اللى
مايستهلکش و لا يستاهل مشاعرك و تضحيتك، و لا انت
تستموت و تفضل عايش دور الضحية عشان اخترت غلط
و لا تكمل باقى حياتك بتدفع تمن الاختيار الغلط، و لا
تستهلك مشاعرك فى حاجة مش حتضيف لرصيد سعادتك
أى شئ، ابذل طاقة و وقت و مشاعر للى يستاهل بس غير
كدة و فر طاقتك و استجم، اسمع مزيكا، سافر، و لا تشغل
تفكيرك الناس شايفينك ازاي، اشترى سعادتك، من الآخر
اشترى دماغك.

حالة الركود

سنين طويلة عدت، لا أفكار بتتغير و لا حاجة بتتحسن و اللى يبوظ مش بيتصلح والكويس مش بنظوره و الناس خدت على كدة، بطلت تفكر، بتكسل و اللى يفكر يغير بيتحارب، ما حدش عايز يشغل مخه أو يتعب نفسه فى حاجات جديدة مش عارفها، وأسهل حاجة يقولها هذا ما وجدنا عليه آباءنا و أجدادنا، احنا مين عشان نغير، و لا نفكر، لحد ما العقول صدت و النفوس صدت و اللى نبات فيه فيه نصب فيه، يا ترى العيب فى مين، فى اللى استسلم لحالة الركود العامة دى و بطل يفكر و لا فى اللى عنده أفكار جديدة احتفظ بيها لنفسه عشان خايف تتسرق أو جاله احباط سريع و محاربش لآخر نفس، و لا العيب فى الاتنين، فى الآخر النتيجة واحدة، حالة الركود العام اللى وصلنا لها بقت أمر واقع بس على قد ما هى سيئة و محبطة على قد ما هى ممكن تكون أحسن حاجة حصلت لغاية دى الوقت لأن هى الحاجة الوحيدة اللى حتشجع

الناس من كتر سوءها إنهم يخرجوا براها و يغيروها ، و اللى قاعد يشتكى طول الوقت حيجى فى الآخر و يتمرد على حالة الركود دى ، فى الأول الكل فعلا مستسلم ليها بشكل غريب و لمدة عقود لكن لأن الدنيا بتتغير و بتطور حاولينا فيه محاولات كتير ظهرت و حتظهر لإزالة الركود ده ، و هى عاملة زى السمك كتير قوى من السمك المولود حديثا بيضيع فى البحر عشان كدة بيبقى أعدادهم بالملايين لأن اللى بيكمل منهم عدد قليل مقارنة بعددهم الأصلي ، و احنا نفس الحكاية مع كل يوم جديد بيشرق علينا بيتخلق رغبة جديدة جوة كل واحد مننا لإزالة الركود ده و ممكن مع الظروف و الأيام و الإحباط بتموت الرغبات دى لكن من حكمة ربنا إنها بتتجدد و مش بتموت حتى لو احنا نفسنا قاومناها جوانا و مع كتر المحاولة التغيير بيحصل ، بس الموضوع صعب جدا خصوصا إن غالبا انت بتمشى فى طريق التغيير لوحدهك و فين عقبال ما تلاقى حد له نفس حماسك و يقدر يكمل معاك بس حتلاقى ، مقاومة حالة الركود فطرة زى الهوا و الإنسان الذكى هو اللى يدرك أهمية الفطرة دى و يستخدمها لمصلحته .

ورقة ملونة

عارف انت لما تمسك ورقة شيكولاتة ملونة و عجبك شكلها من برة و نفسك تاكل اللي جواها، لكن المفاجأة بقى انك لما حتفتح الورقة مش حتلاقي شيكولاتة، حتلاقي دود، عايش حياته جوا الورقة الملونة، حتحس بإيه، حتحس بقرف و يمكن متاكلش شيكولاتة من النوع ده تانى، ده اللي أنا حسيته النهاردة الحاجة اللي من برة حلوة قوى، و لما تدخل فى تفاصيلها تلاقى دود، نفوس مدودة و عقول مدودة، و اللي اتبنى فى سنة يتهد فى لحظة على إيد حد جاهل، و تحس انك بتحارب لوحدك قدام ناس ما عندهاش وعى و ماشية بروتين غبى وهو قشرة و من جوة الروتين فساد مستشرى عارفين بوجوده وساكتين عليه عشان شاريبين دماغهم، و البنيت بتحكى لى حكايتها و اللي انا شففته بعينى خلانى للحظات اشوف إن عندها حق تسيب الدنيا و تهج و تشتري دماغها هى كمان، لكن لقيت نفسى باقول لها من غير ما احس كلام بما معناه، كملى

طريقك مهما كان صعب و طالما حققتى إنجاز و لو بسيط و شوفتیه بعينك ماترميهوش ورا ظهرک عشان اللی حوالیک بيققدوا عليك أو مش عايزينک تنجح و انک نقطة النور وسط الضلمة اللی موجودة، إحساس حلو انک تبقى متقدر و متشاف کویس، و هی ماکنتش حاسة بقيمة الإنجاز اللی هی عاملاه عشان حالة الإحباط العام اللی عايشة فيها، بس لما حسنت إن فيه إيد بطبطب و بتداوى الوجع، صحى الأمل جواها من جدید بس انا مقلتش كلمتين وروحنت، أنا حاولت أديها خطة عملية تمشى عليها، حتى فى ظل كل الظروف الوحشة... بالفطرة بيكون فيه محاولة للمقاومة، طول ما انت عايش ماتتنازله عن محاولة المقاومة دى، صحیح الواقع اسوأ من اللی كنا بنسمعه بمراحل بس مش بالسوء اللی یخلىنا نفقد الأمل نهائى، و إذا كانت ورقة الدنيا الملونة مليانة دود من جوة، فاللی عندنا أقوى من الفساد اللی فيها، احنا عندنا حلم أقوى من كل الواقع اللی رافضينه و صحیح الحكاية محتاجة صبر و طول بال و أعصاب باردة بس مش حنرتاح فى الآخر إلا إذا خلىنا ورقة الدنيا الملونة حلوة من برة و من جوة.

حالة

على فكرة أسهل حاجة تعملها انك تفضل تلعب دور الضحية على طول، عشان تفضل مظلوم و تثير عطف الآخرين بس الحقيقة انك حتكون حسب حالتك يعنى لو دايمًا حواليك المحبطين و اللي شايفين كل حاجة زى الزفت حتفضل مسجون فى دور الضحية اللي مافيش فى إيده حاجة يعملها، أما لو خلّيت حواليك الناس اللي بتكافح و مبتياسش وبتقرا قصص العظماء اللي حققوا نجاحات رغم كل البلاوى اللي شافوها، حتعيش الحالة دى، و حتعرف إن مش انت لوحدك اللي كدة و مع الوقت حتلاقى نفسك واحد من العظماء اللي حاربوا الدنيا عشان حلمهم، من الآخر مصيرك بتحدده حالتك و إدراكك والحاجات اللي بتختار تعيش وسطها أو حتى اللي بتتفرض عليك، الحالة اللي بتعيش فيها هي اللي حتكتب تاريخك.

نصك الحلو

المهم انك تعرف تشوف الحلو اللي فيك و تعرف تحميه من الوحش اللي فيك، لأن النصين الحلو و الوحش مسئوليتك، و الاتنين تحت سيطرتك، حافظ على نصك الحلو عشان هو اللي يستاهل تعيش عشانه و ماتزعلش من نصك الوحش عشان من غيره ماكنتش حتشوف الحلو و طالما أدركت إن عندك نص وحش، ده كفيلا انه يخليك تسيطر عليه و تتحكم فيه، و اكيد مش حتمحيه خالص لأننا بشر بنغلط، ده كمان ساعات بتحتاجه لما الدنيا تقلب عليك، ساعات بتلجأ له عشان ترجع حقك بس بعد كدة ترجعه لوضعه الطبيعي، إنه درجة ثانية، الاستين يعنى، لكن الأصل هو نصك الحلو اللي لازم يكون غالب، مع الوقت حتعرف تستخدم، إيه، امتى، كله فى سبيل بقاء نصك الحلو.

حياة جديدة

قبل ما تبدأ حياة جديدة، لازم تتصالح مع نفسك، ماتفضلش تجلدها على غلطات زمان و لاحتى تتغر بإنجازاتها، كل مرحلة لها ظروفها و كل وقت و له أدان، بلاش تخلى نفسك أسيرة مرحلة عدت أو شعور عدى، اتعلم من اللى حصل زمان، و الانبساط اللى عشته خده معاك فى حياتك الجاية بس بطعم اللى جاى مش طعم اللى فات، حياتك الجديدة تستاهل كل طاقتك و فرحك و أملك و حلمك و تعبك، ماتخسرش اللى جاى عشان خسرت اللى فات.

أقوى الأسلحة

أقصى درجات الألم و عدم الاحتمال هي التي بتخلي الإنسان يتحدى نفسه و وجعه ويهزمهم و هي دي فايذة الألم الحقيقية لأنه بيطلع كنزك الحقيقي ، انت ممكن ، لا أكيد قاعد في جو محبط و مليان مرض و ألم و بينعكس عليك و على أدائك و دايمًا حاسس إنك يائس أو عيان وإن كل التي بتعمله مش حيوصل لحاجة عدلة بس حتكتشف إن دي حجة من جواك عشان تريح ضميرك و إن لو عندك كل الإمكانيات و ما انتاش عيان برضه مش حتعمل حاجة عدلة ، عشان كدة قبل ما تقول الدنيا زي الزفت شوف انت فعلا عايش عشان حاجة و لا سايب نفسك للأيام مطرح ما تحطك تتحط و تقول ظروف ، و ارجع و اقول إن الألم هو سلاح قوى إذا ماكنش أقوى الأسلحة على الإطلاق التي يإما تدمرك أو تحييك.

المطفشاتي

انتوا طبعاً سمعتوا عن حاجة اسمها قانون الجذب
وكتاب السر و انك لما تبقى عايز حاجة الطاقة الخزعبلية
اللى جاية من جنوب افريقيا حتتحد مع السحر العجيب
و توظف كل حاجة حواليك عشان تجذب الحاجة اللى
انت عايزها و بغض النظر عن اقتناعى الشخصى من عدمه
بمثل هذا القانون، فأنا متأكدة إن البنى آدم لما فعلاً بيعوز
حاجة بجد بياخد بالأسباب و بيسيب الباقي على الله و
بياخذ اللى تعب عشانه فى الآخر و فى أحيان كثير و
بفضل ربنا بتحصل حاجات خارج الحسابات و الفرج
بيجى من غير ترتيب، بس لأن ربنا شاء و إرادته غلبت
المنطق البشرى اللى احنا بتفكيرنا المحدود يعرفه، ده احنا
عارفينه و بنعيش الحلم و بنصدقه و بنوظف كل طاقتنا و
حواسنا لهدفنا من غير ما نحسبها لأننا بنكون مستمتعين
و راضيين بالنتيجة و واثقين فى حكمة ربنا، طب عكس
قانون الجذب إيه، سامعاكوا بتقولوا قانون التطفيش، إيه

قانون التطفيش ده، ده بقى بيطبقه الناس اللي شايفين كل حاجة زى الزفت و مافيش فايده و أمل ماتت محروقة و طول الوقت بتحاوط نفسك بمشاعر وأفكار بتغذى الإحساس ده لحد ما تصدقه و يبقى عقيدة متمكنة منك، و من غير ما تحس تبقى مطفشاتي، يعنى لو حد فكر يساعدك أو يسهلك أمورك أو يقرب وجهات النظر عشان تقرب من حلمك للأسف مش حيعمل كدة عشان ماتكبسوش، اللي بيقول مافيش شغل و اللي بيقول الجواز غلى و ماحدث يقدر على مصاريفه و اللي تقول مابقاش فيه رجالة يعتمد عليها و تعمم و غيره و غيره، الشغل صعب، ماحدث قال إنه مش صعب، الجواز مقرف، هو فعلا مقرف و مصاريفه كتير و مشاكله كتير، و لا الراجل عارف يعنى إيه مسئولية و لا الست عارفة يعنى إيه بيت و زوج و أولاد، انتوا كدة انبسطتوا، ارتاحتوا، استسهلتوا، اسهل حاجة انك تقول دى شغلانة وحشة و لا الجواز صعب عشان تريح ضميرك و تفكيرك من فكرة السعى و مواجهة الحقيقة إن المشكلة الأصلية مش فى الظروف و لا فى الشغل و لا فى الجواز، المشكلة فى نفسك، خايف من الفشل، خايف تتساق وسط الطريق و يتغدر بيك، فقدت الثقة فى نفسك و اللي حواليك بعد تجارب كتير غير موفقة بتكون حيلة دفاعية انك تبقى مطفشاتي، عشان مايقاش فيه إلزام عليك تجاه حاجة أو شخص بمجرد ما حد ييلمح لحاجة ممكن

توصلك لهدفك بتخاف و بتجربى منها و بتطفشه و انت بتعمل كدة من غير ما تحس، يبقى عينك فى الحاجة و خايف تقرب منها بس خلّى بالك ما حدش حيثاحيل عليك عشان تاخذها، لو ماكنش شايف إن عندك رغبة حقيقية فيها هى بالذات، فى كلامك و تصرفاتك و تعبيراتك، عمره ما حيحاول يفتح لك سكة اصلا عشان توصلها، طول ما انت عمال تقول دى حاجة صعبة أو ده حد صعب أوصله انت فعلا عمرك ما حتوصله، و يوم ما تعوز بجد فعلا كل السكك المفقولة حتتفتح بأمر المولى بس بلاش زناخة مخ و سوء تقدير للمواقف و الكلام، خليك واعى لكل حاجة حواليك و للكلام اللى بتقوله و الحاجات اللى بتعملها، عشان انت ممكن تكون متصور انك بتبذل مجهود عشان توصل لحاجة أو لحد و انت بدل ما تكون بتشده ناحيتك، بتبعده عنك، و تخليه مايقريلكش، بسبب سوء تقديرك و حالة النفور العامة اللى انت عايش جواها، و انك بتبعد عنك أى حاجة ليها علاقة بالحلم بعد ما كان فاضل لك على تحقيقه خطوة و لا خطوتين بالكثير، لو عايز تحقق حلمك البعيد، ارجوك ماتبقاش مطفشاتى.

الكلام نظري

الكلام النظرى مبقاش جايب همه ، مهما سمعت كلام أو قريت كتب مش حتحس بقيمة ده كله غير لو طبقت على الأرض ، لأن الممارسة الحقيقية و الخبرة الفعلية أجدع من اى كلام نظرى و ده اللي احنا حنعمله ، لو عايزين نحسن و نطور مش حنتكلم ، حنشتغل ، حنضحك ، حنلعب ، حنحس بقيمة كل حاجة بنعملها ، مش حنقول كلام نظرى تانى ، حنحس بجمال روحنا اللي ربنا خلقها و قد ايه هى جميلة و تستاهل تتحب و تستاهل تضحى عشانها و تبنيها و لما تقع تعافر عشان تقوم تنصفها و حتى المشاكل حتبقى لمصلحتك و حتخليها فى صفك ، لما تحب نفسك و تقويها ، حتتحدى بيها الدنيا كلها ، و حتعرف إن أى محنة كانت لازم تحصل عشان هى سبيل للوصول لحلم الروح وأمله ، كفاية كلام نظرى .

حياة الروح

ساعات بتبقى المشكلة مش فى البداية، بتبدأ كويس قوى، بس المشكلة انك بتيجى فى مرحلة تقف، ماتعرفش تكمل، توصل لنقطة اللى بعدها مجهول بالنسبة لك، و ده بيكون أحيانا ضرورى عشان تراجع كل حاجة فى حياتك، صحيح حققت إنجازات لا بأس بها، لكن كل مرحلة فى حياة الإنسان لها طبيعة خاصة بيها، حتى لو حتكمل اللى بدأتها، فى الغالب مش حتقدر تكمله بنفس الأسلوب والطريقة و مع نفس الناس، اختلاف الخبرة والزمن و العقليات اللى بتتعامل معاها، أحيانا كتير حيفرض عليك انك تغير خطتك وتفكيرك و يمكن اتجاهك نفسه، وأنا ماباعتبرش ده فشل، أنا باعتبره تطور طبيعى، خصوصا ان معدل التغيير اللى بيحصل سريع جدا و للأسف بيكون فى الظواهر فقط، ماحدث بينتبه إن اللى فى العقول بيتغير و الأفكار بتتغير حتى لو أصحابها ماتعمدوش ده، عشان كدة خليك مرن كفاية انك تغير أفكارك أو اسلوبك أو

حتى أهدافك نفسها، لأن الهدف البشرى الوحيد اللى الكل
حيتفق عليه هو إثبات الذات كلنا بنحاول نثبت وجودنا،
فأى حاجة حتساعدك على تحقيق ذاتك ماتترددش و دوس
فيها و أكيد الشئ اللى بأكد عليه دايمًا، انك ممكن تغيير
أى حاجة إلا إنك تتنازل عن أخلاقك و قيمك، لأن ما فيش
تحقيق ذات من غير أخلاق.

تحقيق الذات بأخلاق = حياة الروح.

تم بحمد الله

السيرة الذاتية

د. هايدي شرف

- ولدت في الاسكندرية عام ١٩٨٧.
- تخرجت في كلية صيدلة، جامعة الأهرام الكندية عام ٢٠١٠.
- مدرب تنمية بشرية معتمد من مركز ICNLP د. عنتر سليمان.
- حاصلة على دبلومة المهارات الشخصية.
- حاصلة على دبلومة البرمجة اللغوية العصبية.
- ممارس عام برمجة لغوية عصبية.
- حاصلة على دبلومة الاستشارات الأسرية.
- مستشارة أسرية معتمدة.
- حاصلة على دبلومة التفكير CORT معتمدة من مركز ICNLP د. عنتر سليمان.
- مدرب أنماط التفكير CORT .

- معدة و مقدمة برنامج شباب رايق على إحدى القنوات الفضائية عام ٢٠١٥ و ضيفة عدد من اللقاءات التلفزيونية.
- مقدمة أكثر ما يقرب من ٣٣ ساعة صوتية تدريبية أونلاين.
- مؤلفة كتاب «نسمات عابرة».

<https://www.facebook.com/ketabnasamat3abera/?-fref=ts>

للتواصل مع الكاتبة

حساب فيسبوك

<https://www.facebook.com/haidy.sharaf>

الفهرس

٥	مقدمة
٧	وجع
٩	حبة آه، حبة لأ
١١	خليك قد حلمك
١٢	مش مهم
١٤	طريق الحياة
١٥	لحظات فارقة
١٦	البركة عنوان الخير
١٧	صندوق الدنيا
١٨	المعركة الأخيرة
٢٠	قرارك
٢١	مقاومة
٢٢	من نفسك
٢٤	مقارنة
٢٦	قدام الشاشات
٢٨	فين البديل؟
٣٢	حد محتاج لك
٣٣	الوقت

٣٤	رهان
٣٦	على سنجة عشرة
٣٧	اختر طريقك
٣٨	فرصة كويسة
٤٠	اعقلها و توكل
٤٢	خليك قد اختيارك
٤٥	غربال الحياة
٤٧	أداة
٤٨	دفاترنا القديمة
٥٠	فرصة سعادة
٥١	حتة ناقصة
٥٣	على الأرض
٥٥	محطات في حياة بعض
٥٧	علاقات سوية
٥٩	كلام كويس
٦١	كن بجوار الرامى تنج
٦٢	عفريت الزبالة
٦٤	قبل الأوان
٦٦	دايما فيه جديد
٦٧	الانبساط
٦٨	ترتيب ربنا
٦٩	مرحلة جديدة
٧٠	إيه مختلف
٧٢	نفسك و بس
٧٤	هوجة كدابة

٧٥ دنيا
٧٧ اشترى دماغك
٧٨ حالة ركود
٨٠ ورقة ملونة
٨٢ حالة
٨٣ نصك الحلو
٨٤ حياة جديدة
٨٥ أقوى الأسلحة
٨٦ المطفشاتي
٨٩ الكلام نظري
٩٠ حياة الروح
٩٣ السيرة الذاتية

